

Messadi tier la lescha davart la recepziun da burgheis ella vischnaunca Ilanz/Glion

Preziau signur president

Stimadas parlamentarias, stimai parlamentar

La vischnaunca burgheisa dad Ilanz/Glion ha la stad 2017 decidu davart la dissoluziun. Per quei motiv ha la vischnaunca politica tenor art. 78 al. 3 dalla lescha da vischnauncas dil cantun Grischun da surprender la recepziun da burgheis. Per quell'incumbensa drov'ei ina basa legala che regla l'organisaziun ella vischnaunca. La suprastanza communal ha debattau la fin 2017 en duas sesidas davart il sboz dalla lescha. Igl uffeci da migraziun e dretg civil dil cantun Grischun ha examinau il sboz dalla lescha.

Explicaziuns:

Concernent ils termins da dimora prevesa la nova lescha federeala per il cantun e/ni la vischnaunca termins da minimalmein dus resp. maximalmein tschun onns. Tenor art. 4 al. 2 dalla lescha dil dretg da burgheis dil cantun Grischun munta il cuoz minimal per la recepziun el dretg da burgheis per persunas digl exterior a tschun onns. Il termin fixaus egl art. 2 al. 1 dil sboz dalla lescha communal ha surpriu quei cuoz minimal.

Tenor lescha dil dretg da burgheis dil cantun Grischun san las vischnauncas incassar taxas che cuvieran las expensas effectivas. Il rom dallas taxas vegn fixaus egl art. 24. La suprastanza communal ha fixau las taxas ell'annexa dil sboz dalla lescha tenor lavur effectiva. Ultra da quei ein las taxas vegnidadas cumparegliadas cun autras vischnauncas sco era vischnauncas burgheisas.

Alla sesida dils 8 da december 2017 ha la suprastanza communal deliberau la lescha per mauns dil parlament communal. Sin fundament digl art. 35 lit. a dalla constituziun communal (CC) ei la fatschenta en competenza dil parlament communal e suttamessa al referendum facultativ (art. 32 al. 1 lit. a CC).

Proposta:

Sebasond allas explicaziuns precedentas propona la suprastanza communal al parlament communal d'entrar ed approbar il sboz dalla lescha davart la recepziun da burgheis ella vischnaunca Ilanz/Glion (lescha da burgheis; Lburg 15.1).

Ilanz/Glion, ils 22 da fevrer 2018

Suprastanza communal Ilanz/Glion